



Las mattatschas dil turnier final da KickIt d'uonn.

Mattatschas giogan culla balla

Cuera metta peisa sil sport per mattatschas

DA LEILA CADRUVI / ANR

■ **KickIt – in cuors da ballapei: Denton buc in cuors da ballapei usitau. KickIt ei numnadamein mo per la schlatteina feminina.** Dapi il november 2014 dat ei tals trenaments a Cuera. Mintga mattatscha dalla scola primara sa separicipar. Sunter bunamein treis onns surdat la fundaziun IdéeSport il project «KickIt» al marcau da Cuera. Pil mument dat ei otg cuors ch'ein reparti sin tschun scolas (Barblan e Herold, Lachen, Stadtbaumgarten e Rheinau).

Menar cun confidanza

Per ordinari ein circa otg mattatschas dal-

la primara dalla partida. Mintga cuors organiseschan e planiseschan duas scolaras dil scalem ault. Aschia san lezzas rimnar empremas experientschas da menar ina gruppa. Plinavon organisescha il ressort

da sport dil marcau da Cuera scolaziuns ed emetta era in attestat da lavur per ellas. Per mintga trenament survegnan las scolaras dil scalem ault in pign daner da sac. Il svilup dallas giuvenilas ei «extraordinari interessants» per la menadra dil ressort da sport da Cuera, *Sabine Neuwirth*. Ellas emprendien da menar «cun confidanza il cuors», conferma Neuwirth.

Plascher dil ballapei

La giuvna *Denise* ha in tal plascher d'esser in coach ch'ella viseta vinavon ils cuors, sch'ei drovien ella, era sch'ella hagi gia finiu la scola superiura. Ella s'engaschi gia dapi treis onns pil cuors KickIt. Dasperas

accumpogna ina menadra carschida ils trenaments. Las scholaras dalla primara treneschan mintg'jamna e separticipeschan inaga ad onn ad in turnier. Las duas mattatschas *Selin* ed *Ylenia* visetan uonn KickIt e manegian: «Nus dein semplamein bugen ballapei.» Ellas frequentien era il cuors per saver passentar in bi temps cun collegas, manegian ellas.

«Egls tarlischonts»

La motivaziun da Sabine Neuwirth seigi d'animar mattatschas, che fetschien buc aschi bia sport, da semover. Il ressort da sport dil marcau da Cuera hagi il pensum d'augmentar la quota dalla populaziun

che fetschi activamein sport. Damai ch'ins sappi che mattatschas hagian dapli breigia d'anflar access al sport seigi KickIt in project ideal. Per Neuwirth eis ei interessant da veser co las mattatschas fan progress, aschia ch'ellas san giugar fetg bein ballapei. Cunzun co ellas fetschien quei sport cun «egls tarlischonts» ed «engaschi» seigi bi da contemplar, raquenta la funzionaria dil marcau. Fetg loschs seigien ins che bunamein l'entira equipa da Cuera 97 consisti uss ord anteriuras mattatschas dil cuors da KickIt.

«Volltreffer!» per buobs

Sper il cuors KickIt ch'ei mo per matta-

tschas porscha il marcau da Cuera uss era in cuors da ballapei per buobs cul tetel «Volltreffer!». Il ressort da sport da Cuera sviluppa stediamein novas purschidas. Da niev porschan els era en collaboraziun cullas canortas d'affons cuors da sport sur miezgi «Betreuter Mittag». Damai ch'ins sappi da studis regiunals, denton era naziunals, che biars giuvenils calien da far sport gia el scalem superiur, lessien ins era empruar da collaborar el futur cun quella vegliadetgna.

Dapli informaciuns davart il project KickIt ni autras purschidas anfleis sut:
www.stadtschule.chur.ch



La mattatscha emprova da tuccar exact en in dils rudials.

FOTOS MAD